

pedes sunt penitus fere negligentes, & in remotiora ac peregrina nimis intenti, cum Thalete in foveas incauti procidunt, vel decrepitis aniculis deridendi; nimirum præproperè nimis inferentes, cum universalem aërearum mutationum causam esse Solem sit palpabile, particulares etiam, quæ generalem hunc influxum Solis ad specialem istam varietatem determinant, è cœlo pariter esse arcessendas; nullâ profectò, non dicam necessitate, sed veri saltem aliquâ specie: siquidem effectûs alii in terris innumeri observantur universali Solis actione produci indubiè soliti ( e. g. ceræ liquefactio, luti induratio, insectorum, si non cæterorum animalium omnium, generatio, vegetabiliumque totuplicis differentia germinatio &c. quorum specificatio tamen ( ut cum Scholis loquar ) à causis partialibus elementaribus, ac feminalibus ideis sive dispositionibus, quæ succum alimentarem ad hanc & istam partium enutritionem diversimodè determinant, evidentissimè dependet.

III. Neque verò adèò in obscuro positæ sunt causæ illæ particulares in ipso hoc Elementari mundo reperiundæ, quæ halitûs istos à Solis calore, Lunari fortè lumine quoque tantillum per vices adjuto, excitatos non solum in diversas adèò meteororum formas disponant, sed in has, istas, illas, regiones, aut incerto varioq; aut statò magis tempore, deferant aut deflectant, neq; adèò copiis cœlestibus auxiliaribus, ex immenso intervallo advocandis universam terram influentiâ suâ ( si qua pollent in eam sensibiliter efficaci ) quotidie obambulantibus, adeoque & ipsis universali-ter tantum operantibus, opus habeant ad istam varietatem aërearum mutationum inducendam: maximè cum & Phænomena superiùs enarrata, speciatim XVII. & XVIII. satis evincant, Ventorum flatûs utramque quod ajunt, paginam in hoc facere negotio, nec ipsimet Astrologi, magnam istorum vim in mutandis quotidie tempestatibus esse, ausint inficiari; prout num. IX. Hypoth. cap. III. recensitarum ostendimus. Quod verò huic manifestæ ventorum efficaciam alias etiam occultas causas adjungendas putent, & ventos ipsos eorumque varietates ab astris, ex immenso intervallo, arcessere laborant, in eo profectò ludunt operam suam; siquidem illud haut necessarium, hoc verò prorsus impossibile esse facile demonstratu est iis, quibus animus est in tantum sui compos, ut præjudicia illa Astrologica, cum ipso lacte nutricum imbibita,